



Uittreksel van de rekening van Adriaan Screvel, rentmeester van Kennemerland en Friesland van de uitgaven van reparaties aan de Middelburg bij Alkmaar (1444/45).

Nationaal Archief Den Haag; NL-HaNA_3.01.27.02
Grafelijkheidsrekenkamer
(1305) 1446-1812; inv. nr. 875

Transcriptie: Ben Dijkhuis, maart 2022

Ander uutgheven van alrande werke

Eerst Evert Reymerszoon timmerman tAlcmair, heeft ghetimmerd up die Middelburch binnen de *termyn* van dese rekeninghe. Eerst dat groote heck mit die scuttinghe bi de cleen valbrugghe gheset ende noch een nien scuttinghe ghemaect 20 voeten lanck van nieuwen eyken planken ende verckoenen. Item dair tgroote heck stont zuytoost, omme tot voor de brugghe vanden huse allanx, eene scuttinghe ende barbelkane ghemaect van revelsche borderen, al in twee ghecort. Ende alzo ghewrocht mit goeden stilen ende reghelen wel vast gheset. Ende an de cleene valbrugghe twee verckoenen onder gheleyt. Een rack ghemaect. Eene venister in die ghevel an tbouhus. Die crebbe ende roysse ghelanghet dair over, dat die voorschreven Evert t ghewrocht heeft, allene mits de hulpe de rentmeesters knecht, die de rentmeester met en reket 19 dagen elcx daichs vij groten, facit 3 lb 6 sc 6 d ende voor zinen cost elcx daichs iijij groten, facit 28 sc. Loopt tsamen timmerwerck van desen jare

5 lb 4 sc 6 d

Grossen vanden voorscreven werke

Betailt ter cause vanden voorscreven werke ende al bi den voorscreven Evert eenen man gheheeten Kurt t Alcmair 10 st^ucken eycken planken tsamen costen xvij stuuvers. Clays Gaarbrantszoon twee eycken verckoenen costen v stuuvers. Jan Abbezoon twee cleyne eycken verckoenen 3 stuuvers. Item Ijsbrant Talens van 200 revelsche borderen, coste elc hondert 5 Rijnsche gulden, facit 10 Rijnsche gulden. Item 20 groote stilen 4 groten, facit 40 stuuvers. Item van drie balxknes dair die Rijnsche gulden aff ghesneden waren costen tsamen 40 stuuvers. Item noch 22

palen, costen tstick 3½ groten, facit 38½ stuuvers. Item noch 2 balxkens, costen 28 stuuvers. Item tot IJwebrant de smit ende tot Jacop Maertuszoon an alle mannen van naghelen cleen ende groot tsamen dair voor betailt 35 stuuvers. Item tot Clays Garbrantszoon een groot waghescot coste mit saghene 5 stuuvers. Item tot Jan Gheerits een blat wagescots 2 stuuvers tot Jan Liwerts een boeken planck 4 stuuvers ende een spec, een stuuver ende een deel esschen houten, costen 2 stuuvers Item noch tot Jacop Martinsszoon an alle mannen van nagelen.

ende ijswerck hier toe dienende tsamen xvij stuuvers, loopt al tsamen die voorscreven stoffe

21 lb 8 sc 6 d

Heinric Aerentszoon maetselair van Hairlem ghewrocht up die Middelburch binnen den termijn van desen rekeninghe die ghevel boven an dat bouhuus die half te vooren ghemets was voort op toten dake toe ende een fundament ghemaict inde graft, an twestende mit vier boghen oivergheslagen uter graft omtrent vij voeten hoge boven water om namaels dair voort up te timmeren de koken te verstivene waert noot is mits dat met langher staen mach, ende alle maniere van beteringhe ghedaen an thuys dairt noot was boven ende beneden, ende alomme ghestopt, dair hi mit eenen knecht over ghewrocht heeft 15 dagen elkes dages behalven zinen cost 8 groten ende den knecht 4 groten daiche ende voir horer beider cost elcx daichs 8 groten loopt alt t samen

7 lb 10 sc

fol. 23r

Willem de stienbacker tAlcmair betael voor 7000 cleyn bacstien elc duusent 28 groten ende voor 2000 dubbelde bacstiens elc duusent 54 groten al ghebesicht toten voorscreven werke mits anden steen ende calck datter van te vooren ghebleven was loopt die somme vanden steen voorscreven

7 lb 12 sc

Mathijs arbeider tAlcmair vanden voorscreven steen vanden steenhouen te brenghen mit wagen tot up twater ende voort mit scuten up dien Middelburgh behalven de hulpe van des rentmeesters knecht van allen zinen arbeide

25 sc

Jan Dul leidecker te Hairlem van dat hi ghedect ende ghewrocht heeft up die Middelburch binnen den termijne van desen rekeninghe over al dairt zeer groot noot was ghestopt mit nieuwe leyn, die goten ghesandeert dair over hi als ghewrocht heeft hem tweestere 4 daghen elcx daichs 14 groten ende voor horer beider coste elcx daichs 8 groten ende van alle manieren van stoff als 1500 leynaghelen 300 leyn ende van 6 lb sondere al ghebesicht toten voorscreven werke 53 stuuvers loopt al tsamen werck cost ende stoffe

4 lb 17 sc

Dierck Andrieszoon reddeckere ghestopt ende ghewrocht over al dairt noot was mit eenen knecht 3 daighen elcx daichs voor hem beiden 12 groten ende van costen elcx daichs 8 groten ende betaelt biden zelve Dirck van alrande stoffe als ryet, cley, liem ende van ropen, lopende tsamen de stoffe 36 stuuvers loopt al tsamen werc cost ende stoffe

3 lb 6 sc

Jan Pieter Obelenzoon van alrande wercke ghedaen van nieuwe 7 oude glase ende stoppinghe over al, mits stoffe van glase ende loode ende andere oncosten tsamen binnen de tijt van deser rekeninghe 45 sc 6 d

Jan Tiabbeguns mit hem vierder van Langhedijck ghewrocht om te maken de voet van groene zoden kniehoghe boven der herden anden de voorscreven groote barberkane van dair tgrote heck scout oist ende zuytwairt omme tot voor de brugghe vanden huuse vander Middelhurch vi daghen ghewrocht behalven de hulpe van des rentmeesters twee knechts die hier niet gherekent en zijn elcx daichs elc van hem buren iijj groten ende voor horen cost voor elc elcx daichs groten, facit al tsamen 4 lb 16 sc

Jacop Rijnier Meyuszoon van twater al uut den graft te pompene up zinen cost bi voorwairden ghemaect 2 rijders, facit 2 lb 10 sc

Hoppe Vredericxzoon van Langhedijck ende Jacop Abuairstzoon van Sinte Panraes mit hem zesten van Langhedijck van Langhedijck ende drie van Outdorp maict hem neghenen behalven des rentmeesters twee knechts die ooc altoos wrochten met gherekent zo wrochten zij neghen voorscreven inde graft om te zuverne ende scoon te maken 14 dagen werckens elc man daichs op zijn eyghen cost iij stuyvers loopt tsamen zonder die knechts voorscreven 18 lb 18 sc

Item voor ghebeden luyden zonder loon dan alleene de montcost dies wasser up eenen dach van Outdorp 20 mannen allen dien dach werkende ende up eenen anderen dach van Coedijck ende Huuswairde warer 54 mannen voor elken man voor zinen cost 4 groten up tminste gherekent, facit tsamen 7 lb 8 sc

VIIJ^e Somma van alle timmeringhe ende ander alrande wercke 24 £ 7 sc 6 d